



Odeessaancho Lade

Leveled







Kuni irkisaanchu maxaafi 'USAID'inni afi'nonni woxu irkonni 'Save the Children'i, Rosu Ministerenna Wodiidi Daga Dagoominna Manni Qoqqowu Mangiste Rosu Biiro mittimmate sumiimmenni qixxaawe attamamino.

2009 M.D











The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: https://creativecommons.org/licenses/



Odeessaancho Lade

Kifile 4 Lamala 24







Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dawartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

Nabbawate Albiidi Xa'mo

Biddissa: Niwaawe nabbawakkira balaxxe tenne woriidi xa'mo dawarate wo'naali.

- 1. Odeessa yaa mayyaate?
- 2. Odeessaanchimmate ogimma maatiro yinanna macciishshite eqennoo? Maa labbannohe?



Gafa Mite


Lade Ayimma

Lade Eegatoti ilante lophitinohu Alatta Wondi woradira ikke mittetenni tonaa lame kifile geeshsha rossinohuno Alatta Wondo katamahooti. Rosose jeefissinohu danchu guminni ikkino daafira yuniverste e'e rosate afidhino kaayyonni Adissaawu Yuniverstera odeessammetenna xaadooshshu golira digirete deerri roso rossino. Konni deerri roso jeefisse addi

addi darga odeessaanchimmate looso loosasenni konni raginni noose ogimma shiima ikkitinokkihura, Ingilizete Afiinni qajeelte afidhino egennonni Sidaamu Afiira qolte loosate hasattose lowote.

Lade Eegatoti rossino barera afidhino egennonni Itophiyu raadoonenna televizhiinera loossanni keeshshitino. Sidaamu daga afiisenni rosatenna loosate kaayyo afidhu kawa Sidaamu Afiinni noohu odeessaanchimmate deerri lopho leellishara lowo sharro assituri giddo mitte iseeti.

Konnira, noose halchonninna jawaantenni xaa yannara Wodiidi Qoqqowira odeessaanote qaritte ikkite massagaanchimmatenni loossanni no.
Konnirano, dadhote rosi odeessamme yannitte doogo ha'runsite lophitara lowo sharro assitanni leeltanno jawaata beettooti. Konni golira jawaantetenni odeessaancho ikkite loosate Sidaamirano Wodiidi dagarano umita meya odeessaancho ikkase lowo maalale ikkino coyeti.



Gafa Lame

Lade Rosu Mine

Lade luphiimu deerrinni rosse afidhino odeessammete tuqu xaadooshshi ragi egennonni lowo geeshsha egennantinota ikkasenni isewiinni egenno afi'rate halchannokkinku dino. Konnira Sidaamu Zoone hunda addi addi rosi mine tuqu xaadooshshi mayimma, odeessaanchimmate ragi illachanna tuqi-xaadooshshu danire rosaanote mashalaqqe eersitara koyisantino. Ise yaatto garinni, tuqu xaadooshshe yaa bitimaayyu xaadooshshe yaa ikkanna kunino mannu mimmituwiinni mashalaqqe soorri'ranno buicho ikkasi egennantino. Konnirano, tuqu xaadooshshi lamu

daniho hakkuno budillaanchonna yannanniha ikkasi xawissanno.

Budillaancho tuqu xaadooshsheeti yinannihu mannu budunni ikkitino doogonni mashalaqqe adhannonna tareessanno doogooti. Kunino, addi addi doogonni ikke songote ofolle woy doogo ha'ranni odoo xa'mannote. Sidaamu daga garinni la'niro, "Baadiri mayi no?" yee songote hasaawa hanafate woy mannu hoshshosi garinni afi'rino mashalaqqe xa'mannotenna kulannote. Sidaamaho roore yannara egennantinoti hawarroote woy hashsha jawu nafara assinanni waaree egennantinote.

Waareennihu ofolle mashalaqqe soorri'ranno doogo ikkanna doogaanchu fooliishshi'rino qarqarira mayi ikke galinoro woy hosinoro, "Baadi duduwi mayi hee'ri?" yee xa'matenni mashalaqqe adhanno.
Yannite odoo adhinanni doogo kayinni, lowontanni tenne budillaancho doogonni baxxite egennantanno.
Lawishshaho, mannu ikke hosinore woy galinore noo darga hee'renni qoonqonna misile afi'rino udiinnichinni afanno. Kunino, maccatenni macciishshe

woy noo ikkito illetenni lae badatenni reqeccantino addimma buuxi'rannote.

Budunninna yannite doogonni mashalaqqe afi'nanni gari mereero badooshshu hee'rirono, lamunku horo kayinni shiima assine la'nannita di'ikkiino. Budunni mashalaqqe afi'nanni doogo macciishshate aana irkidhinota ikkite mittuwiinni wolunniwa sa'u bikkinni addimmase huluullo afidhinota ikkase digattanno. Kunino, macciishshinore mittu woleho tareessi bikkinni qara mashalaqqe lexxitanni woy xe'anni daase gattannokkihuraati. Yannitte mashalaqqe adhinanni doogo kayinni, wo'munnino wo'ma ikka hoogiro roore woyite dawate bikki deerra aje afamara dandaannoho.

Budunnihuno ikko yannannihu budu xaadooshshi horo afi'noho. Tuqu xaadooshshinni gobbate hobbaate kalaqannorenna hunannore bade afatenni furga'ne assi'rate woy meessaneeto dirbannunni gatisate babbaxxitino qaafo adhinara kaa'lanno. Loosi'rate, assi'rate, ceate, mi'ne hee'ratenna dargunni darga millisate tuqu xaadooshshi manchi beettira bayira horo afi'noho.

Hundinni ka'e daggino dhagge leellishshanno garinni, budillaanchu tuqu xaadooshshi raganni roore beeqqo afi'nohu labbaa manchooti. Waareete darga leelle Harbee Gaaxita Haweeli Yaanaaseta addi addi mashalaqqe abbannohunna macciishshannohu labbaaholla. Meentu macciishsha dandiirono, hedonsa hasaawunni beeqqe xawisate kaayyo hakkeeshshi geeshsha diafi'ranno. Ladera tini budillaancho ikkito meyata woffisatenni sa'inokkitanna dandoose kaddinota assite la'annote. Konni daafira, hee'noonni lophote deerri garinni tini budu lao yannitetenni soorrama hasiissannose.

Yannitte tuqu xaadooshshi doogga la'niro kayinni, yanna yannantenni meentu beeqqooshshe leddanni dagginotanna hasiissannota Lade xawishshinni anafanni. Egennotenni lophitino Ameerika labbino gobbuwara nafa albi yannara odeessaanchimmate barera meentu beeqqo ajje leeltannota xawissanno. Ikkollana, xaa yannara kayinni hala'ladunni meentu beeqqanni kaajjado ikkinorenna maafudamino adda reqeccishate bareende insa qote daannohu dino.



Gafa Sase

Tuqu Xaadooshshi Dana

Lade xawissanno garinni, yannillaanchu tuqu xaadooshshi addi addi daninni mashalaqqe tareessa dandaanno. Hakkuno, woraqatunniha, bubbennihanna interneetenniha ikkasi xawissanno. Woraqatunni mashalaqqe iillinshanni udiinnichi giddo gaazeexunna maxaaficho egennantinoreeti. Lamunku giddonni balanxe gaazeexunnihu mashalaqqe sayinsanni dani hiittoohoro la"ate wo'naallo.

Gaazeexu mashalaqqe borrotenni sayisannoha ikke babbaxxitino yannanni lawishshaho barru barrunni, aganu aganunni, woy sasu aganinni fulara dandaannoho. Lawishshu gedera, Sidaamu Afiinni "Bakalcha" yaamame sasu agani giddo mitte hige fulanno gaazeexi egennaminoho. Konni albaannino, "Luwa" yinannihunna "WAGS" yinanni gaazeexi Sidaamu Afiinni fulate dandiitino gaazeexuwa ikkansa Lade seekkite rosaanote xawissu.

Woraqatunniha tuqu xaadooshshe ikkitinoti wole maxaafichote. Maxaaficho, gaazeexunninte gede borrotenni mashalaqqe tareessate tuqi-xaaddo ikkite mitte murantino yanna giddo fultannote. Fultannohuno, lamalatenni, aganunni, woggatenni, woy dirunni mitte higge ikkinohura kuusamino duduwo reqeccishshanno.

Sidaamu Afiinni lawishshaho kullanniri "Wogankenna Fichee" yitannori ficheetenna afuunna wogate simpoozeemera dirunni mitte higge fultannori qara qarareeti. Wole widoonni, bubbete tuqu xaadooshshi danira kiirantannori raadoonetenna televizhiinete. Kuri tuqu xaadooshshi dani uminsa suudenna horo afidhinore ikkite duduwonna mashalaqqe iibbadotenni tuqissannoreeti. Mashalaqqenna duduwo iillishshanno doogono bubbetenni ikkinohura horoonsi'nanni udiinnichi ragaanni macciishshinanninna daa"antanni garinni hakkawoyintenni odoo adhate woy rahote mashalaqqe afi'rate kaa'litannoreeti.

Raadoone mashalaqqe sayissannohu maccatenni calla macciishshine adhinanni garinniiti.
Raadoonetenni afi'nanni mashalaqqeno addi addita ikkite lawishshaho ayyarennita, fayyimmannita, giwirinnunnita, rosunnita, polotikunnitanna woleno konne lawannoreeti. Ayyarete mashalaqqe yinanni woyite xeena gananno woy arrishshanno woy gomichanno gara hegersatenni yannanna barra bade afe qorophate kaa'litanno. Fayyimma lainohunnino, dhibbu kaimanna taraawanno dooggara bande anfoonni garinni qaafo adhate lowo horo afidhino.

Wole, bubbennita tuqu xaadooshshi woy bitimaayyu xaadooshshi dana ikkitinoti televizhiinete.
Televizhiine, ikkinorenna ikkanni noore noo garinni fafowano ikko mule gobba giddoonninna gobbaanni ikkanni noore illetenni la'nanni duduwo anfara dandiissitanno udiinnichooti. Tini raadoonetenni roore woyyaawino garinni mashalaqqe tareessitannohura, huluullo ajishshanno tuqi-xaaddo danaati. Mannu minesi hee'renni hasiissanno mashalaqqe ikkadu garinni afi'rara dandaanno.

Televizhiinetenni sa'anno mashalaqqe addi addita ikkite lawishshu gedera gobbate giddoyidinna gobbayidi ikkito, rosu, giwirinnu, fayyimmatenna woleno konne labbanno hajo bubbetenni mitteegge sa'anno. Konni udiinnichinni yanna, ikkito, heeshsho, keeru woy hobbanke kalqoomu deerrinni maa labbannoro barru barrunkunni buuxatenna egennono afi'rate dandiinanni.

Lawishshaho, Itophiyu televizhiine, Amaaru televizhiine, Wodiidi televizhiine, wolootuno addi addi afiinni mashalaqqe tareessitanno gobbate giddoonni egennantino tuqu xaadooshshi bueeti.

Wole tugu xaadooshshi dana ikkitinoti kayinni, interneetetenni taje afi'nanninna sayinsanni doogooti. Konni garinni, mimmituwiinni odoo afi'nanninna mimmitoho odoo kullanni doogga giddo imeelenna feesi-buuke egennantinoreeti. Kuri lamenka horoonsi'ne mashalagge mimmituwiinni soorri'rate kompiyuterenna netiworke yinanniri qiddetenni hasiisannoreeti. Kompiyutere, addi addi suuditanna danita ikkite ilekitirikete xaadooshshinni horoonsi'nanni udiinnichooti. Netiworke kayinni, ayyarete qiddo illete leellannokki xaadooshshe ha'runsite udiinnichu ragaanni injo kalagganno xaadisaanchooti.

Interneetenniha tuqu xaadooshshi dana ikkitinoti feesi-buuke roore mobayletenni horoonsi'nannita ikkite dagi-xaaddo tuqu xaadooshshi hunda afamannorira kiirantannote.

Feesi-buuketenni, rahotenni addi addi dani odoo woy mashalaqqe adhanna aa dandiinannihura dancha yannillaancho xaadooshshu buichooti. Addi addihu mashalaqqete dani lawishshu gedera hoshshotenna galtinote hajo, ayyaanu barrinni sayinsannita dancha kaayyo halcho, tunceenyu ikkito, dinye, daddalu hajo, jaloomimmate dilgo, woleno konne lawannoreeti. Muleno fafowano noohu xu'e anjichinni xa ikkire mimmituwiinni afate qara yannitte xaadooshshu doogooti. Lade tenne egenno shotunni xawisate dandiitino Sidaancho odeessaancho ikkasenni lowo rosaano anga ganatenni baxillensa xawissu.



Gafa Shoole

Sidaamu Afii Tuqi-xaadooshshe

Lade yaatto garinni, tuqu xaadooshshi kalaqaminohu afuu noohuraatinna sa"annohuno afuunniiti.
Konni kaiminni, Sidaamu Afii lophore balanxe heda hasiissuro Sidaamu Afii rosunniha, loosunnihanna xiinxallonniha ikkinku lemuu diri sainosi. Konne deerra iilli geeshsha, xaadooshshu deerrasino lexxanninna horoonshu raginni bowiranni leellanno. Xaa yannara, Sidaamu Afii borrotenninna coyi'rammetenni bowiranni daasi ledo amadame

hala'litino bowirre deerra iillano hoogiro ikkado tuqu xaadooshshi lopho leellishanni no. Kunino, borronnihu, bubbennihunna interneetete tuqi-xaadooshshi Sidaamu Afiinni danchu deerrira no yaate dandiinanni. yite Lade foole qo'litu. Sidaamu Afiihu tuqu xaadooshshi gaazeexunna maxaafichote dani boodunni wo'naalamanni nooho. Gaazeexu lopho sao maniidhinota ikkiturono, gafa sasu hunda xawinsi garinni doogote gattu qaazeexubba lawishshaho kayinsannireeti.

Maxaafichuwano ikkiro, bashiltino yaate xiiwannori ajirono wona xawinsiri ficheete qoleno afuunna wogate simpoozeemera fultannori kullannireeti. Bubbete tuqi-xaadooshshi ragaanni, raadoonete hunda xaa yannara afantanno effemmete dani Furrati, Bansitinna Shaashamannenniti danchu deerrira nooreeti. Televizhiine lainohunni, muli yannara Wodiidi tuqi-xaadooshshi hunda fa'nante lamalatenni sase barra mitte saate finco loossanno yite hoo'litukkinni rosaano anga rabbi rabbi assitu.



Gafa Onte

Ladenna Tuqu Xaadooshshe

Lade odeessaancho ikkitinohu tuqu xaadooshshi ogimmanni rosasenni ikkanna, balanxe xawinsi garinni Sidaamaho umi ogeetteeti yaate dandiinanni. Noose egenno deerrinni aju akkali ayirrisannosehu meyate worbimma konninni xawisateeti. Konninni kainohunni, Sidaamu dagara calla ikkikkinni wole dagarano assitanni noo owaante shiima

ikkitinokkihura qoqqowu deerrinni wo'munku tuqixaadooshshira qara massagaancho ikkite doorantino.

Konne assitanni heedhenni, Sidaamu Afii odeessaanchimma lophitaranna loossanni nooti Sidaamu Afii tuqi-xaaddo gikki yitara addi sharro assate aana no.

Lade worba odeessaancho ikkase deerrinni addi addi ragaanni konni golira bitimaayyu xaadooshshi lopho hardisate assitannorinni sa'e luphiima rosu deerrano iillate dandiitino. Rosose gobbate giddoonni rosatenni sa'e gobba widirano fulte rosase calla ikkikkinni hala'lado fullanke rosicho afi'rate lowo doogo ikkinosehura qara fullahaancho ikkate dandiitino. Konnira, tuqu xadooshshi raginni Oroppu gobbara marte fullankete roso rosse gudasenni Lade dottora ikkite maassantu.

Dottorcho Lade Eegatoti iillitino deerri addanka wole Sidaamu wedellanna seenne lowohunni kakkayisara dandiinota baalunku wodanchanno. Konne deerra iillate kaa'linosehu umisi tugu xaadooshshinni afidhanno mashalagge ikkase ise umisenni coyidhanna macciishshinanni. Lawishshu qedera, qobba roso afi'rate horoonsidhinohu imeeletenni assitanno odoo soorri'rate ha'rinshonniiti. Ise calla ikkikkinni. gaazeexu widoonni, televizhiinete widoonni, imeeletenninna w.k.l tugu xaadooshshubbanni loosono ikko roso afi'rara dandiinohu bacaho. Kuni leellishannohu, tuqu xaadooshshi horo tenne borronni calla xawinse tungannikkita ikkaseeti.

Nabbawate gedensiidi xa'mo

Biddissa 2: Aante noo xa'mo niwaawete hedo garinni dawari.

- 1. Tini dhagge ayere kultannote?
- 2. Lade odeessammetenna xaadooshshu golira umi digire rossuhu mamaati?
- 3. Budillaanchunna yannillaanchu tuqu xaadooshshi mereero noo xaadooshshenna badooshshe xawisi.
- 4. Raadoone macciishshite egennoo? Hakkaanni afi'rootto/a mashalaqqe qaagantannoheti nooro hedde xawisi.

















